



PRAVILNIK O RADU MEDŽLISA **ISLAMSKE ZAJEDNICE BOŠNJAKA SJEVERNE AMERIKE**

UVODNE ODREDBE

Član 1.

Medžlis je viša organizaciona jedinica Islamske zajednice Bošnjaka Sjeverne Amerike (u daljem tekstu - IZBSA), koja obuhvata džemate koji čine povezanu cjelinu jedne regije.

Medžlis sačinjava najmanje deset džemata na jednom području.

Ovim pravilnikom utvrđuju se način rada u okviru medžlisa, nadležnosti glavnog imama medžlisa, postupak donošenja akata, prava i dužnosti članova skupštine medžlisa i druga pitanja u vezi sa radom skupštine medžlisa.

Organi medžlisa su skupština medžlisa, glavni imam medžlisa i nadzorni odbor medžlisa.

GLAVNI IMAM MEDŽLISA

Član 2.

Glavni imam medžlisa saziva sjednice skupštine medžlisa.

Glavni imam medžlisa predsjedava skupštinom medžlisa.

Glavni imam medžlisa se brine o vjerskom životu na području medžlisa i odgovaran je za rad imama, hatiba i muallima na području medžlisa.

Glavni imam medžlisa predstavlja medžlis u stvarima vjere.

Glavni imam medžlisa nadgleda i koordinira rad imama u džematima.

Glavni imam medžlisa se stara o kvalitetu rada imama i daje smjernice imamima na području medžlisa u vezi sa mektebskom nastavom i radom sa omladinom.

Glavni imam medžlisa pomaže imamima u osmišljavanju i pripremanju polaznika mektebske nastave za takmičenje mekteba na nivou medžlisa.



SKUPŠTINA MEDŽLISA

Član 3.

Skupštinu medžlisa čine delegati džemata, koji su članovi džemata najmanje tri godine u kontinuitetu, a biraju se na osnovu broja članova džemata po sljedećem kriteriju:

1. džemati koji broje do 200 (dvije stotine) članova biraju jednog delegata u skupštinu medžlisa,
2. džemati koji broje između 201 (dvije stotine jedan) i 300 (tri stotine) članova biraju dva delegata u skupštinu medžlisa
3. džemati koji broje preko 300 (tri stotine) članova biraju tri delegata u skupštinu medžlisa

Glavni imam medžlisa i imam džemata su delegati skupštine medžlisa po položaju, neovisno o broju delegate.

Delegati skupštine medžlisa biraju sekretara medžlisa.

Skupštinom medžlisa predsjedava glavni imam medžlisa .

Skupština medžlisa prati i koordinira ukupan rad džemata u okviru medžlisa i daje neophodne smjernice u radu džematskih odbora.

Skupština medžlisa izvršava odluke i provodi uputstva viših organa IZBSA i usvaja godišnji izvještaj.

Skupština medžlisa bira i kandiduje člana izvršnog odbora iz reda džematlija ispred datog medžlisa.

Skupština medžlisa, uz konsultacije sa glavnim imamom medžlisa, utvrđuje mjesto i vrijeme održavanja mektebskog takmičenja na nivou medžlisa.

Kvorum skupštine medžlisa čini natpolovična većina od ukupnog broja zastupnika.

NADZORNI ODBOR MEDŽLISA

Član 4.

Nadzorni odbor medžlisa koordinira rad džematskih odbora i daje im uputstva za rad.



Nadzorni odbor je nadležan da rješava eventualne sporove u džematima na području medžlisa.

Nadzorni odbor medžlisa broji 5 (pet) članova.

SJEDNICE SKUPŠTINE MEDŽLISA

Član 5.

Glavni imam medžlisa priprema, saziva i vodi sjednice skupštine medžlisa.

Sjednica skupštine medžlisa održava se najmanje jednom godišnje.

Članovi skupštine medžlisa dobivaju materijal za sjednicu skupštine od sekretara medžlisa najmanje 10 (deset) dana prije sjednice.

Sekretar skupštine medžlisa vodi zapisnik sa sjednica skupštine medžlisa.

Zapisnik mora sadržavati: redni broj sjednice, mjesto i datum održavanja, vrijeme početka i završetka, popis prisutnih, rezultate glasanja, te prijedloge i odluke u vezi svake tačke dnevnog reda.

U prilogu moraju biti svi materijali o kojima se na sjednici raspravljalo.

Zapisnik sa sjednice mora se izraditi u roku od petnaest dana od zaključenja sjednice i smjestiti u arhivu sa odlukama skupštine medžlisa.

Potpisani zapisnik ne smije se ispravljati, mijenjati ili nadopunjavati.

Delegati skupštine medžlisa glasanjem odlučuju da li se dnevni red dopunjuje nakon izlaganja predsjednika skupštine medžlisa.

Nakon otvaranja sjednice i prihvatanja zapisnika sa posljednje sjednice, glavni imam medžlisa podnosi kratki izvještaj o radu u periodu između dvije sjednice.

Zatim se raspravlja o tačkama dnevnog reda, na taj način da ih glavni imam medžlisa iznosi i da se zatim članovi skupštine medžlisa javljaju, za diskusiju koja je ograničena na tri (3) minute) a dužina replike na jednu minutu.

Isti delegat se može javiti za ponovnu diskusiju tek kad svi delegati završe sa svojim diskusijama.



Kod potrebe donošenja odluka, svi delegati glasaju i odluka se prihvaća kad je donesena većinom prisutnih članova.

ODLUKE SKUPŠTINE MEDŽLISA

Član 6.

Odluke skupštine medžlisa bilježi sekretar medžlisa na temelju zapisnika, a potpisuje glavni imam medžlisa, a u njegovoj odsutnosti sekretar, ako je predsjedavao cijeloj ili dijelu sjednice.

PRAVOSNAŽNOST, IZMJENE I DOPUNE

Član 7.

Ovaj Pravilnik stupa na snagu danom donošenja. Amandmani na ovaj Pravilnik mogu se donositi samo na Skupštini IZBSA.

IZBSA

13246 N. 23rd Ave. Phoenix, AZ, 85053

21. novembar 2020. g./06. Rebiu-l-ahir 1442. h.g.

Dr. Hazim ef. Fazlić
Moderator Skupštine
Islamske Zajednice Bošnjaka Sjeverne Amerike